

## Namn på veg på Dalen i Skrautvål sameige

Kattul Vel er eit nystarta hyttevev som ønskjer eit eige vegnamn på hyttefeltet sitt. Feltet ligg langs Svarthamarvegen på Dalen i Skrautvål. Dei skriv: «Inntil hytteområdet ligger et lite tjern som vi mener heter Kattultjednet. Navnet har vi funnet i gamle skyldelingsforretninger i området. Navnet Kattul, har antakelig noe med Røyskatt i ur å gjøre. Vi ønsker derfor at vejen får navnet Kattulvegen, og at det blir satt opp vegskilt.»

Sjølve namnet Kattulvegen er eit godt forslag, sidan dei meiner å kunna dokumentere at tjednet like ved heiter Kattultjednet. Namnet står ikkje på norgeskart.no eller valdreskart.no. Viss namnet har samanheng med *ur/urd* i tydinga steinsamling, burde det kanskje skrivast «urd» for å vise at ordet kjem av urd, og at uttalen er tjukk l. Men det kan òg vera ei dialektuttale av «kattugle», som blir trekt saman når det kjem framfor eit nytt ord. Frå Søyland i Gjesdal kjenner eg Kattulskræene, som ikkje har med urd å gjera, fordi uttalen då ville ha vore /katturs-/ (altså ikkje tjukk l). Eit anna spørsmål er om det bør vera binde-s, altså Kattulsvegen.